

Inuit Pisinnaatitaaffinut Kalaallit Nunaata siunnersuisoqatigiivi pillugit Inatsisartut inatsisaannut nr xx xx xx 2012-meersumut siunnersuut

Naalakkersuisut Siulittaasuat

Saqqummiussissut

Naalakkersuisut Siulittaasuat

1. Siullermeerneqarnera

Inatsisartut 2008-mi ukiakkut ataatsimiinnerminni Inatsisartut aalajangiinerisigut taamanikkut Naalakkersuisuusut Nunat tamalaat pillugit ilisimatusarneq kiisalu Inuit pisinnaatitaaffii pillugit qitiusumiit ataatsimoortumik sullissivimmik pilersitsinissamut Danmarkimi Naalakkersuisut suleqatigalugit Nunatsinni periarfissanik misissueqqaat (UPA 2008/85).

Taamanikkut Naalakkersuisuusut siunnersuut erseqqinnerusumik misissorniartulugu piomassuseqarput, peqatigitilluguli ajornartorsiut uparuarlugu ilisimatusarnermik ilinniarsimasut allallu ingerlaqqiffiusumik ilinniarsimasut taamatut eqiteruffiusumi suliassanik suliaqarsinnaasut naammangimmata. Taamaammat Naalakkersuisut isumaqarlutik aningaasaqarnermut tunngatillugu kingunerisassaasa, sulisut qaffasissumik ilinniagaqarsimasut sulisussarsiarineqarsinnaanerata kiisalu nunani allani suliffeqarfiit taamaattut allat suleqatiginissaannut periarfissat, paasineqarnissaat pisariaqartoq.

Danskit naalakkersuisui Dansk Center for Internationale Studier aamma Menneskerettigheder atorunnaarsinniarlugu peqatigitillugulu Dansk Institut for Internationale Studier aamma Institut for Menneskerettigheder pillugit immikkut ittumik inatsisitigut tunngavissiiniarlutik februar 2012-mi siunnersuummik saqqummiussipput.

Institut for Menneskerettigheder – Danmarks Nationale Menneskerettigheder pillugit siunnersuutip tusarniaassutigineqarneranut atatillugu Naalakkersuisut siunnersuuteqarput inatsisip kunngip peqqussutaatigut Kalaallit Nunaannut atuutilersinneqarsinnaanera siunertarlugu Namminersorlutik Oqartussat Inatsisartut inatsisaatigut Kalaallit Nunaanni Inuit Pisinnaatitaaffii pillugit Siunnersuisoqatigiinnik pilersitsinnaasasut, ilaatigut Institut for Menneskerettigheder – Danmarks Nationale Menneskerettighedsinstitutionip siulersuisuinut ilaasortassamik toqqaasinnaasunik. Taamaaliornikkut ataatsikkut pingaarutilimmik piginnaasanik ineriartortitsisoqarnissaa anguneqarsinnaasaaq, taamatuttaaq Kalaallit Nunaanni inuit pisinnaatitaaffiinik sulineq aalaakkaalersillugu kiisalu Institut for Menneskerettigheder-ip aamma Namminersorlutik Oqartussat akornanni suleqatigiinnissaq pillugu pisortatigoornerusumik tunngavissiisoqarluni.

Nunanut allanut Ministeri aamma Folketingip Nunanut Allanut Ataatsimiititaliaa inatsisissatut siunnersuummut tunngatillugu siunnersuummut akuersaarput uagullu kingunerani Nunanut allanut Ministerip aamma Nunanut Allanut Ataatsimiititaliap siunniussaasa naammassineqarnissaat siunertaralugu Naalakkersuisut Nunanut allanut ministeriaqarfimmik oqaloqatiginnippugut.

Isumaqatigiissutigineqarpoq, Inatsisartut inatsisissaattut siunnersuut manna akuersissutigineqarniariapat Nunanut Allanut Ministeri Institut for Menneskerettigheder – Danmarks Nationale Menneskerettighedsinstitution pillugu inatsisip allanngortinneqarnera pillugu inatsisissatut siunnersuummik saqqummiussiniarpoq, tassuuna Inuit Pisinnaatitaaffiinit Kalaallit Nunaata Siunnersuisoqatigiivisa Institut for Menneskerettigheder – siulersuisuinit taamaaliornikkut ilaasortassamik toqqaasinnaanerannut inatsisitigut tunngavissiisoqassammat

Taamatut oqaaseqarlunga siunnersuut Inatsisartunut akuersortumik suliarinissaanut tunniuppara.